

諸子平議補錄
卷一七



諸子平議

補錄

祿均署

諸子平議補錄序

當遜清末葉俞蔭甫先生以治樸學有聲于世曾湘鄉尤激賞之蓋先生夙有著述才其爲學閎博精深信曠代難逢之鴻儒也今人章太炎曾爲蔭甫撰傳謂俞先生說經依高郵王氏律令成羣經平議以剿述聞又規雜誌作諸子平議治羣經不如述聞諦諸子乃與雜誌抗衡徵諸章言則諸子平議爲俞著之尤粹者斷可知矣自辛亥國變後古學荒蕪識者憂歎一時名流又稍以國故相號召而治諸子學者尤眾緣海通而還國人習尙驟變競慕新奇諸子各有獨到尤熹夸言危論

冀以動人宜乎挾冊之士眎同珍寶也然僞書如林錯簡甚多重以注疏蕪穢校讎弗精欲攻其學而得其要不綦難與廣都李君澄波稚齡嗜學壯而益劬課徒立言孳孳不懈深閔諸子之學不章而學人之自相迷罔者多也乃校刊俞氏諸子平議十五種嘉惠士林正其涂轍繼復恐有遺珠之歎又搜索俞氏諸書重得關于諸子者別二十種集而刊之顏曰補錄以示別于平議原書亦思存蔭甫之舊不欲輕有更易耳校刊將竣因屬余爲序以余之愚烏足以序先哲之偉作然賦性孤僻獨好稽古平居言學于遜清乾嘉諸哲景仰尤切念

蔭甫亦存中清樸學之緒者也而舉世滔滔無人知學則又思澄波刊書之悵弗顯而先哲著述之苦心亦必闇而不明遂畧言蔭甫諸子平議之所以獨絕及諸子學之不易治治之之當知取法于先哲藉以詔示後學期其深造庶幾不致眎同書賈牟利投時之爲則尤余與澄波之私願也夫中華民國第一甲子二月上旬成都舒君實序于學鈍室

序

曲園先生敘孫仲容先生札逖云余喜讀古書每讀一書必有校正所著諸子平議凡十五種而其散見於曲園俞樓兩雜纂者又不下四十種俞先生好讀書必加校正書經先生讀後則古人受先生之益多矣後之讀古人書者又受先生之益先生前不見古人而古人感謝於泉壤後不見來者而來者歡迎於兩間余往年涉獵諸子有不解者證以先生之平議而瞭然故喜讀先生之書然讀書之心雄於我者不乏其人獨惜先生之書蜀中流傳甚少近聞版片已壞遂絕來源因重刻先

生諸子平議十五種又於此十五種外補刻二十種卽
先生所謂散見者也名之曰諸子平議補錄

中華民國十一年歲在壬戌中秋月雙流李天根澄波
敘於念劬堂

諸子平議補錄

目錄

鬻子一卷

山海經一卷

鄧析子一卷

楚詞一卷

孫子一卷

文子一卷

公孫龍子一卷

鵬冠子一卷

鹽鐵論一卷

潛夫論一卷



論衡一卷

中論一卷

抱朴子一卷

文中子一卷

鬼谷子一卷

新語一卷

說苑一卷

韓詩外傳一卷

吳越春秋一卷

越絕書一卷

諸子平議補錄卷一

錄著書餘料

德清俞樾

鬻子

鬻子一書爲子書之祖然文多錯誤其篇第尤不可解余讀其書校出誤字數處輒志之於此

昔之帝王所以爲明者以其吏也昔之君子其所以爲功者以其民也力生於神而功最於吏福歸於君

樾謹按力生於神句文義不倫唐逢行珪注云王者有國必先靈祐皇天上帝社稷山川神迹元符無不來會失之鑿矣此神字乃人字之誤人卽民也孝經



天之經也地之義也民之行也釋文曰民本作人蓋
人民古通稱耳上文言帝王所以爲明者以吏君子
所以爲功者以民君子卽吏是也蓋言帝王恃吏吏
恃民然則天下之事全賴民力以成故曰力生於人
而功最於吏福歸於君也人與神聲同因而致誤解
者不能是正而曲爲之說遂使平易之文頓成迂誕
矣

民者賢不肖之杖也賢不肖皆具焉

樾謹按此杖字無義乃材字之誤蓋賢不肖皆空名
必附乎人而後某人賢某人不肖乃實有所謂是民

者賢不肖之材質也漢人書材字或作材因誤爲材耳

杖能側焉忠信飾焉

樾謹按此杖字亦材字之誤側字未詳賈子新書大政篇作技能輸焉恐亦未是

上民與之明上舉之士民若之明上去之

樾謹按此若字是苦字之誤其意言民之所與上則舉之民之所苦上則去之文甚明白易曉且與舉苦去皆一韵此四句乃有韵之文苦誤爲若不特失其義且失其韵矣賈子大政篇故士民譽之則明上察

之見歸而舉之故士民苦之則明上察之見非而去
之其文與此相同正作士民苦之逢行珪不能據以
訂正而依誤字爲說陋矣

雙流李天根校刊

雙流謝家玉

成都舒君實

覆校

諸子平議補錄卷一

諸子平議補錄卷二

錄著書餘料

德清俞樾

鄧析子

鄧析子二卷江陰劉氏影宋本刊於吳中余得其書偶校出誤字數處若其錯誤顯然人所共見或疑似難明不可校正者則姑不及焉

不以知慮則合於無然矣

樾謹按然乃朕字之誤朕誤爲朕因誤爲然矣無朕與上文無形無兆一律

上循名以督實下奉敎而不達

樾謹按達當作違字形相近而誤也

責疲者以舉干鈞冗者以及走乎

樾謹按冗乃兀字之誤莊子德充符篇魯有兀者釋
文引李云則足曰兀是也乎乃守字之誤守讀爲獸
古人或段狩爲獸漢張遷碑帝遊上林問禽狩所有
石門頌惡虫幣狩狩皆卽獸字是其證也此云走守
蓋又省狩爲守耳責疲者以舉干鈞兀者以及走獸
文義甚明因兀誤爲冗段守爲獸而又誤作乎字遂
不可讀

豈在振目揜腕乎標鞭朴而後爲治歟

樾謹按乎字亦手字之誤手標鞭朴四字爲句標字無義或是操字形近而誤歟

故遠而親者忘相應也近而疏者忘不合也

樾謹按兩忘字皆忘字之誤

若扶之攜謝之與讓故之與右諾之與已相去千里也樾謹按此文有脫誤文子上德篇作扶之與提謝之與讓得之與失諾之與已相去千里當據以訂正惟提與攜義本相近不必改也

一聲而非罵勿追一言而忽罵不及

樾謹按罵字無義乃四馬二字之誤一聲而非四馬

勿追一言而忽四馬不及卽所謂駟不及舌也

爲之斗斛而量之則并斗斛而均之爲之權衡以平之則并與權衡而竊之爲之符璽以信之則并與符璽而功之爲之仁義以敎之則并仁義以竊之

樾謹按均之功之皆無義均與功并竊字之誤俗書竊字或作窃故或誤爲均或誤爲功也莊子胠篋篇文與此同而皆作竊之可據以訂正

此重利也盜跖所不可桀者乃聖人之罪也

樾謹按此有錯誤莊子胠篋篇作此重利盜跖而使不可禁者是乃聖人之過也據此則重利下衍也字